

Labone Hirikgong 29, 2009 Kgatiso 18

Tewane o kopa mapodisi

Ka Booster Mogapi

MAHALAPYE - Kgosi ya Tewane, Rre Keobonye Kalanke a re go tlhoka mapodisi go jesetsa banni ba motsana wa gagwe mo kgobedung ka jaana ba utswelwa dithoto, loruo le gone go ketekwa ke magodu tota.

Kgosi Kalanke o bolelse BOPA gore go tlhoka mapodisi a morafe go dira gore batho ba itirele boithatelo ka jaana ba itse fa go se na yo o ka ba tseelang dikgato fa ba tlola molao. O kopile puso go romela mapodisi kwa motseng wa Tewane gore ba kgone go itepatepanya le seemo sa bogodu jwa leruo jo a tlhalotseng fa bo ile magolets.

A re le fa a lekile go buisana le morafe wa gagwe mabapi le medumo ya diletso tse di lalang di lediya masigo, seo ga se a tswa maduo ape ka jaana beng ba dishabini tse di rekisang Chibuku le majalwa a a ikomelewang ba lets go bosigo le motshegare ba sa emise.

Kgosi Kalanke a re beng bangwe ba dishabini ba re ga go na ka fa ba ka emisang go rekisa majalwa ao ka teng ka jaana e le one a ba direlang madi a go tsenya bana dikole le go reka dijok a jaana bontsi jwa bone ba sa bereke.

A re e re ntswa badiri ba khanske ba ba lebaneng le go tseela batho ba ba tsosang medumo masigo dikgato le go laola dinako tsa thekiso ya majalwa ba setse ba kile ba ya go buisa phuthego kwa motseng wa gagwe, maiteko a bone ga a a tswa tema ka banni bangwe ba motse ba santsa ba tsweletse ka go lets le go rekisa majalwa bosigo.

Modulasetilo wa komiti ya ditlhabololo tsa motse oo, Rre Gaoleso Mmoni a re le fa kgosi a leka go kgalema mabapi le dintwa tse di dirwang mo motseng oo, ditlhapa le go

utswela ba bangwe dithoto ka dikgoka go tsweletse.

Rre Mmoni o supile batsadi bangwe ka monwana ka a re ba na le seabe mo go rotloetseng bana go utswa dithoto tsa Batswana ba bangwe ka e ya re ba utswile batsadi ba amogele dithoto tsa go nna jalo le go gana go ya go thusa ka bosupi fa go sekwa kwa lekgotleng ka ba itse fa bana ba bone ba ka latlhelwa mo kgolegelong.

O boletse fa sengwe se se tshwenyang e bile se tsotsitse kgotlheng e le batho bangwe ba ba reng ba batla motse wa Tewane o kgaogangwa ka bogare gore ba kgone go nna le kgotla ya bone gammogo le kgosana ka jaana ba re kgosi Kalanke ga se kgosi ya bone.

Rre Mmoni o rile go ikgaoganya ka bogare ga banni ba Tewane go dirile gore banana ba motse oo, ba nne ka go lwa letsatsi le letsatsi mo go dirang gore bogodu bo tseye phekelo e sele ka jaana batsadi ba tshaba go kgalema ka ntla ya go boifa go itewa ke bana. BOPA



Bagolwane ba British Council, Rre Stephen Forbes le Rre Winfred Rasina, ba na le moitseanape wa temo ya masingwana ka ditlhotschwana go tswa Britain, Rre Richard Reynolds (fa gare) kwa phuthengong ya babegadikgang ka Labobedi. Rre Reynolds o mono go ruta batho ka go ipopa ditlhotschwana tsa balemi ba ditshingwana, tiro e e itebagantseng le go tlhabolola tikologo le matshelo a batho.

Senepe: Tshoganetso Mokowe.

Dikomiti di Iwantsha borukutlhi

Ka Selinah Samson

PALAPYE - Banni ba Palapye ba tlhophile dikomiti tse di tlaabong di itebagantse le go Iwantsha borukutlhi mo dikgotlaneng.

Ra Mapodisi a Palapye, Rre Kobedi Dintwe o tlhalosa fa go tlhama dikomiti tse e se go bolaya komiti e e ntseng e le teng ya twantsho borukutlhi, mme sa tsone ke go thusana nayo.

A re dikomiti tse di tlhamilwe ka taelo ya ba lephata la itsireletso

le thokgamo le tona wa lone, Rre Dikgakgamatsi Seretse a neng a ikuela gore di tlhangwe gore di tle di thuso go nna matho a dikgosi go Iwantsha borukutlhi.

Dikomiti tse ke tse di tlaabong di itebagantse le go kgalemela ba ba rekisang majalwa mo go sa lettelesegeng le ba ba itirang digongwanagongwana tse di ka bakang borukutlhi kgotsa boithatelo mo motseng ka maikaelelo a go senya.

O tsweletse a rotloetsa Batswana

gore ba boele mo ngwaong ya bone ya bogologolo e neng e re fa moeng a tsena mo motseng go bo go ya go begelwa kgosi.

O ba tlhagisitse gore fa ba ntse ba fitlha batswakwa mo matlung puso e dirile molao gore fa motswakwa a swela mo lapeng la gago ke mathata a gago gore o isa jang setopo seo kwa ga sone.

Mo kgannyeng e nngwe Ramapodisi o ne a tlhagisa batsadi gore ba kgalemele bana ba bone ba lese go lala ba gobeya mo motsing bosigo, a ba a kopa borre gore le

bone ba emise go keteka basadi ba bone.

Mothusa kgosi wa Palapye, Rre Klass Motshidisi ene o ne a bolela fa dikomiti tse di tlaa thibela batho bangwe go itirela jaaka ba batla mo motseng ba se na sepe le molao.

A re o lebogela puso gore e bo e bonye go le botlhokwa gore go boelwe kwa morago go baakanngwe molao ka gore go lebega tlhako e tsene kgamelong golo gongwe mo molaong, selo se se dirileng gore batho ba latlhelgele ke setho. BOPA

Bagodi ba tshwanetse go emela dituelo

Ka Tuelo Tlotleng

TSABONG - Bagodi ba kgaolo ya Kgalagadi borwa ba gakolotswe go nna teng mo gae kgwedi le kgwedi ka nako ya fa ba ya go neelwa dikamogelo tsa bone go fema go kgaolwa mo dikamogeleng.

Mogolwane wa lekalana la dituelo tsa bagodi, Rre Jakoba Tau o kopile gore bagodi ba ne ba fitlhelwa mo mafelong a ba a dumalaneng le ba dituelo go fema dikgang tsa go phimolwa mo lenaneong ka go se na fa ba ba bolokelang madi teng ba sa ntse ba batlw.

Rre Tau o tlhalositsa motho a phimolwa morago ga dikgwedi tse thataro ba sena go boa boa kwa go ene ba fitlhela a seo mme ebile a sa tlogela lefoko lepe.

A re fa motho a phimotswe jalo

ka o a bo a diegile gape a sa dira ditumalano dipe tsa go bolokelwa madi, ga a na go bona sepe e bile fa a goroga o simolola kwadiso sesha.

Rre Tau o gakolotse bagodi go dira thulaganyo le di banka le poso gore madi a bone a tle a tsene mo dipolokeleng tsa bone, ka a re seo se ka ba tlhofofaletsa tiro le go itsa go tlolwa ke kgwedi.

Tlhaloso e, e tla jaana morago ga go ngongorega ga ga mme Magret Mojombe a supa fa rraagwe,

Rre Khukhunaka Repe wa kwa Phepeng gaufi le Draaihoek, a sa bona madi a gagwe a dikgwedi tse tharo ka 2007 a o neng a tlhoka go a tsaya ka a ne a se yo, mme gape ya re ba re ba a latela ba seka ba kgotsofadiwa ke karabo e e neng e re ba ka a bona fela fa ba ile Gaborone. BOPA

BOTETI UNIFIED ENGLISH MEDIUM SECONDARY SCHOOL

VACANCY

Due to increase in enrolment the following subject positions have arisen:

ACADEMIC

English, Literature, Setswana, Mathematics, HSB, DVS, Religious Education, Commerce, Geography, Double Award Science, Christian and Religious Education, Social Studies, Business Studies, Guidance and Counseling, Agriculture and Computer Studies, General Science and Moral Education.

VOCATIONAL

Computer, Secretarial, Management and Accounting.

REQUIREMENTS

Applicants should preferably be Diploma holders or Degree holders with not less than three years teaching experience

Send your application including CV with names and contact addresses of two referees to:

Boteti Unified English Medium Secondary School

P/Bag 007

LETLHAKANE

Tel: 71322237, 71302017, 2978289

Fax: 2978251